

VIII. Therapeuticum. In paroxysmo febrili potenter refrigerantia malè porriguntur, quia sic turbatur natura in certamine suo contra morbi hostilitatem suscepto, quod nullo alio instrumento aut armis perficere potest, quàm energià caloris, materiæ morbificæ coctionem & edomationem ex voto accelerantis.

IX. Pharmaceuticum. Pharmacorum confectio & ejus doctrina est armata & essentialis Medicinæ pars, propterià ab ipso Medico exercenda.

X. Chymicum. Arcana Chymica aut Medica quævis, non revelanda iis, qui à Musis & ingenii acumine sunt alieni, nec dandum est porcis ferculum è margaritis.

XI. Cosmesticum. Verum Talci oleum datur, quod & pretio, & raritate, & virtute sua inter omnia Cosmetica principatum tenet. Repagula tamen Talci nequâquam reservari queunt, nisi aquâ siccâ Sophorum, & terrâ virgineâ ad summum puritatis culmen deductâ.

XII. Chirurgicum. Venæ sectionem in febribus malignis, & earum vel principio, vel augmento, vel vigore certo exitialem, sæpiusque feralem esse pronunciamus; Naturæ etenim arma sic infringuntur, & malignitatis pernicies à circumferentia ad vitæ centrum quàm citissimè perducitur. Dùm enim per V.S. subtractum sanguinem continuo resarcire conatur natura, à primis viis & organis naturalibus sanguificationi dicatis, materiam necessariò petere cogitur; cum autem fomes & focus malignitatis circa naturales hos ductus, ac viscera, ut plurimum resideat, ratio in promptu est, cur hic ipse malignitatis nidus violenta q. suctione quâdam ad fontem vitæ deveniat & ita periculum ejus inevitabiliter pariat.

S. D. G.